

Nimewo 24

D E K R È E G Z E K I T I E

DEKLARE YON IJANS POUTÈT KATASTWÒF NAN KONTE CATTARAUGUS, CHAUTAUQUA, ERIE, GENESEE, JEFFERSON, LEWIS, NIAGARA, ONEIDA, OSWEGO, ST. LAWRENCE AK WYOMING AK KONTE VWAZEN YO

KONSIDERE KE, nan 17 novanm 2022 ak apresa, yon gwo tanpèt ivènal prevwa kreye kondisyon danjere nan Eta New York ki poze yon danje iminan pou transpò publik, sèvis itilite publik yo, ak sistèm sante ak sekirite publik nan konte Cattaraugus, Chautauqua, Erie, Genesee, Jefferson, Lewis, Niagara, Oneida, Oswego, St. Lawrence ak Wyoming ak konte vwazen yo;

KONSIDERE KE, tanpèt la prevwa pwodui gwo chit nèj, gwo van ak kondisyon ki sanble ak tanpèt nèj, ki ka koze fèmiti wout, entèripsyon vwayaj yo, blakawout, ak dega nan pwopriyete publik ak prive toupatou atravè zòn ki te afekte yo, ki poze yon menas pou sante ak sekirite publik;

KOUNYE A, KIDONK, MWEN, KATHY HOCHUL, Gouvènè Eta New York, avèk otorite Konstitisyon Eta New York ak Seksyon 28 nan Atik 2-B nan Lwa Egzekitif la (Executive Law) ban mwen, konstate avèk dokiman sa a gen yon katastwòf pandye kote gouvènman lokal ki touche yo pa kapab entèveni kòmsadwa. An konsekans, mwen, avèk dokiman sa a, ap deklare yon Eta Ijans poutèt Katastwòf nan Eta a, ki ap rantre an vigè nan dat 17 novanm 2022, nan limit tèritorial konte Cattaraugus, Chautauqua, Erie, Genesee, Jefferson, Lewis, Niagara, Oneida, Oswego, St. Lawrence ak Wyoming ak konte vwazen yo. Dekrè Egzekitif sa a ap rete an vigè jiska dat 17 desanm 2022; epi

ANPLIS DE SA, konfòmeman ak Seksyon 29 nan Atik 2-B Lwa Egzekitif la, mwen mande egzekisyon Plan Global Eta a pou Jesyon Ijans (State Comprehensive Emergency Management Plan) ak otorize, anvigè apati 17 novanm 2022, ajans yo nan Eta a jan sa nesesè, ak Kwa Wouj Amerikèn, pou yo pran mezi apwopriye pou pwoteje pwopriyete Eta a epi pou ede gouvènman lokal ak moun ki touche yo nan entèvni kont katastwòf sa a epi nan refè anba li, epi pou ofri lòt èd ki nesesè pou pwoteje sante ak sekirite publik.

ANSWIT, deklarasyon sa a satisfè kondisyon 49 nan Kòd Règleman Federal yo (Code of Federal Regulations, C.F.R) 390.23(a)(1)(A), ki ofri sekou nan Pati 390 jiska 399 Règleman Federal pou Sekirite nan Konpayi Transpò (Federal Motor Carrier Safety Regulations, FMCSR). Sekou sa yo nan FMCSR nesesè pou kapab garanti ekip yo kapab debleye wout ki pi enpòtan yo epi akselere mouvman ekip k ap retabli sèvis kouran yo nan Eta New York;

ANPLIS DE SA, avèk otorite mwen genyen dapre Seksyon 29-a Atik 2-B Lwa Egzekitif la pou sispann oswa chanje pwovizwaman nenpòt lwa jeneral, lwa lokal, òdonans, dekrè, règ oswa règleman, oswa pati ladan yo, si respè lwa jeneral, lwa lokal, òdonans, dekrè, règ oswa règleman sa yo ta anpeche, jennen oswa retade mezi ki nesesè pou fè fas a katastwòf la, oswa si sa nesesè pou bay asistans oswa èd pou fè fas a katastwòf sa a, avèk dokiman sa a, mwen sispann oswa chanje pwovizwaman, pou peryòd ant dat Dekrè Egzekitif sa a antre an vigè a jis nan dat 17 desanm 2022, sa ki annapre yo:

- Seksyon 97-G nan Lwa sou Finans Eta a (State Finance Law), nan mezi sa nesesè pou achte manje, materyèl, sèvis, ak ekipman oswa founi oswa bay differan sèvis santralize pou ede gouvènman lokal, moun, ansanm avèk lòt antite ki pa fè pati Eta a ki viktим yo nan kad efò pou reyaji a ijans poutèt katastwòf la epi refè anba li;
- Seksyon 112 nan Lwa sou Finans Eta a, nan mezi li annakò avèk Atik V, Seksyon I nan Konstitisyon Eta a, epi nan mezi sa nesesè pou ajoute plis travay, chantye ak tan nan kontra Eta a;
- Seksyon 163 nan lwa sou Finans Eta a ak Atik 4-C nan Lwa sou Developman Ekonomik (Economic Development Law) la, nan mezi sa nesesè pou achte pwodui, sèvis, teknoloji, ak materyèl ki nesesè yo, san yo pa swiv avi ak pwosesis acha nòmal yo;
- Seksyon 136-a nan Lwa sou Finans Eta a, nan limit ki nesesè pou melanje sèvis konsepsyon ak konstriksyon yo nan yon sèl kontra ak/oswa pou yo jwenn sèvis enspeksyon pou entèvni kont katastwòf ijans ak nan refè anba li.
- Seksyon 38(1), (2) ak (3) nan Lwa sou Otowout la (Highway Law) nan mezi nesesè pou otorize atribisyon kontra ijans;
- Seksyon 375, 385 ak 401 Lwa sou Veyikil ak Sikilasyon (Vehicle and Traffic Law) an, nan mezi egzansyon nan egzijans anrejistremans veyikil, ekipman ak dimansyon, pou veyikil ki gen anrejistremans valid nan lòt

jiridiksyon, nesesè pou ede nan efò preparasyon ak entèvansyon pou ijans lan;

- Seksyon 107.1 nan Tit 21 nan Kòd New York, Règ ak Règleman (New York Codes, Rules and Regulations, NYCRR) nan limit ki nesesè pou bay Gouvènè a otorite pou règlemente trafik ak mouvman veyikil sou wout yo, otowout yo, ak lari yo; epi
- Seksyon 359-a ak Seksyon 2879 nan Lwa sou Otorite Piblik (Public Authorities Law) nan limit pou pèmèt Otorite Thruway Eta New York an pou achte machandiz ki nesesè ak sèvis yo san yo pa swiv pwosesis acha nòmal la.

F È T anba siyati mwen ak So Prive Eta a nan Vil Albany nan
disetyèm jou mwa novanm nan ane de mil
vennde.

SOU LÒD GOUVÈNÈ A

Sekretè Gouvènè a